

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৫৪/২০১৭-১৮

ঢাকা, বুধবার ২০ সেপ্টেম্বর ২০১৭, ৫ আশ্বিন ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। রোহিঙ্গা ইস্যুতে বাংলাদেশের সঙ্গে আছি : প্রধানমন্ত্রী শেখ হাসিনাকে যুক্তরাষ্ট্রের প্রেসিডেন্ট
- ২। রোহিঙ্গাদের আশ্রয় দেওয়ায় প্রধানমন্ত্রী শেখ হাসিনার প্রশংসা করেছেন ফিলিস্তিনী প্রেসিডেন্ট
- ৩। জাতিসংঘ শান্তিরক্ষী বাহিনীতে যৌন নির্যাতন বন্ধে বাংলাদেশের
অঙ্গীকার পুনর্ব্যক্ত করলেন প্রধানমন্ত্রী
- ৪। শ্রমিকদের অধিকার রক্ষায় কাজ করে যাচ্ছি : নিউইয়র্কে উচ্চপর্যায়ের বৈঠকে প্রধানমন্ত্রী
- ৫। কয়েকদিনের মধ্যে চালের দাম কমবে : তিনমন্ত্রীর সঙ্গে বৈঠকে ব্যবসায়ীদের আশ্বাস
- ৬। আজ থেকে উপজেলাতেও ওএমএসের চাল বিক্রি হবে : খাদ্যমন্ত্রী
- ৭। এবারের পূজায় নিরাপত্তা বেশি জোরদার : স্বরাষ্ট্রমন্ত্রী
- ৮। সংসদীয় গণতন্ত্রের বিকাশে সিপিএ সম্মেলন গুরুত্বপূর্ণ ভূমিকা রাখবে : স্পিকার
- ৯। এলএনজি আমদানিতে সিঙ্গাপুরের গানভার ও পেট্রোবাংলার মধ্যে সমঝোতা স্মারক স্বাক্ষর
- ১০। ২৬ প্রবাসী বাংলাদেশি পেলেন বাংলাদেশ ব্যাংকের রেমিটেন্স অ্যাওয়ার্ড
- ১১। পৌরসভার উন্নয়নে আরও ১৬০০ কোটি টাকা দেবে এডিবি

১। **রোহিঙ্গা ইস্যুতে বাংলাদেশের সঙ্গে আছি : প্রধানমন্ত্রী শেখ হাসিনাকে যুক্তরাষ্ট্রের প্রেসিডেন্ট**
নিউইয়র্কে এক সভার ফাঁকে যুক্তরাষ্ট্রের প্রেসিডেন্ট ডোনাল্ড ট্রাম্প ও বাংলাদেশের প্রধানমন্ত্রী শেখ হাসিনার মধ্যে রোহিঙ্গা সঙ্কট নিয়ে আলোচনা হয়েছে। আলোচনাকালে ডোনাল্ড ট্রাম্প এই সঙ্কটে বাংলাদেশের পাশে থাকার আশ্বাস দিয়েছেন বলে পররাষ্ট্র সচিব শহীদুল হক সাংবাদিকদের জানিয়েছেন। গতকাল (১৯ সেপ্টেম্বর মঙ্গলবার) নিউইয়র্কে জাতিসংঘ সদরদফতরে এক উচ্চপর্যায়ের সভার ফাঁকে দুই নেতার মধ্যে এ বিষয়ে আলোচনা হয় বলে পররাষ্ট্র সচিব জানান। পররাষ্ট্র সচিব বলেন, 'যুক্তরাষ্ট্রের প্রেসিডেন্ট বলেছেন, 'মায়ানমার ইস্যুতে আমরা বাংলাদেশের সঙ্গে আছি। এন্ড উই উইল সি হাউ ইট ক্যান বি রিজলভড। সূত্র-সমকাল (পৃ.১,ক.৬), ইন্ডেফাক (পৃ.১,ক.৬), ডেইলি সান (পৃ.১,ক.৭), অবজারভার (পৃ.১,ক.৫)। জনকণ্ঠ, ভোরের কাগজ, ইন্ডিপেনডেন্ট, নিউ নেশন, অবজারভার, নিউজ টুডেসহ অধিকাংশ পত্রিকা এ বিষয়ে ছবিসহ খবর ছেপেছে।

২। **রোহিঙ্গাদের আশ্রয় দেওয়ায় প্রধানমন্ত্রী শেখ হাসিনার প্রশংসা করেছেন ফিলিস্তিনী প্রেসিডেন্ট**
মায়ানমারে দমনপীড়নের শিকার হয়ে রোহিঙ্গাদের বাংলাদেশে পালিয়ে আসাকে দুর্যোগ হিসেবে চিহ্নিত করেছেন ফিলিস্তিনের প্রেসিডেন্ট মাহমুদ আব্বাস। নিউইয়র্কের স্থানীয় সময় গত ১৮ সেপ্টেম্বর সোমবার প্রধানমন্ত্রী শেখ হাসিনার সঙ্গে এক বৈঠকে অংশ নিয়ে এ কথা বলেন তিনি। রোহিঙ্গাদের আশ্রয়ে ভূমিকা রাখায় সবাই প্রধানমন্ত্রী শেখ হাসিনার প্রশংসা করছেন বলেও বাংলাদেশের সরকারপ্রধানকে জানান ফিলিস্তিনী প্রেসিডেন্ট। এসময় প্রধানমন্ত্রী শেখ হাসিনা বলেন, মানবিক সত্তা হিসেবে এ দায়িত্ব পালনের কথা আমাদের মনে রাখতে হবে। তবে সাময়িকভাবে আমরা তাদের আশ্রয় দিচ্ছি। মায়ানমারকে তাদের নাগরিকদের ফেরত নিতে হবে। রোহিঙ্গা সংকট সমাধানে মায়ানমারের ওপর আন্তর্জাতিক চাপ তৈরিতে ফিলিস্তিনী প্রেসিডেন্টের সহযোগিতা চান প্রধানমন্ত্রী শেখ হাসিনা। সূত্র-জনকণ্ঠ (পৃ.১,ক.২), ইন্ডেফাক (শেষ পৃ.,ক.৮), ডেইলি সান (শেষ পৃ.,ক.৮), অবজারভার (শেষ পৃ.,ক.৬)।

৩। **জাতিসংঘ শান্তিরক্ষী বাহিনীতে যৌন নির্যাতন বন্ধে বাংলাদেশের**
অঙ্গীকার পুনর্ব্যক্ত করলেন প্রধানমন্ত্রী

প্রধানমন্ত্রী শেখ হাসিনা জাতিসংঘ শান্তিরক্ষীদের মাঝে যৌন অপরাধ নির্মূলে জাতিসংঘ মহাসচিবের যথাযথ পদক্ষেপের প্রতি বাংলাদেশের দৃঢ় অঙ্গীকার পুনর্ব্যক্ত করে ভিকটিম সাপোর্ট ফান্ডে ১ লাখ ডলার প্রতীকী চাঁদার ঘোষণা দেন। প্রধানমন্ত্রী বলেন, জাতিসংঘ শান্তিরক্ষী বাহিনীতে সর্বোচ্চসংখ্যক সেনাসদস্য ও পুলিশসদস্য নিয়োগকারী হিসেবে আমরা যৌন নির্যাতন ও অপরাধ বন্ধের বিষয়ে সর্বোচ্চ গুরুত্বারোপ করি। এ অভিযোগে আমাদের অবস্থান হচ্ছে জিরো টলারেন্স। প্রধানমন্ত্রী গত ১৮ সেপ্টেম্বর সোমবার জাতিসংঘ সদরদফতরে ট্রাস্টিশিপ কাউন্সিল চেম্বারে যৌন নির্যাতন ও অপরাধ দমন শীর্ষক উচ্চপর্যায়ের এক বৈঠকে এক বিবৃতিতে একথা বলেন। সূত্র-সংবাদ (পৃ.১৬,ক.৩), জনকণ্ঠ (পৃ.১,ক.৫), ডেইলি সান (পৃ.২,ক.২), নিউ নেশন (শেষ পৃ.,ক.১)। সংবাদ, জনকণ্ঠ, ভোরের কাগজ, ইন্ডিপেনডেন্ট, ডেইলি সান, এশিয়ান এজ, বাংলাদেশ টুডেসহ অধিকাংশ পত্রিকা এ বিষয়ে ছবিসহ খবর ছেপেছে।

৪। **শ্রমিকদের অধিকার রক্ষায় কাজ করে যাচ্ছি : নিউইয়র্কে উচ্চপর্যায়ের বৈঠকে প্রধানমন্ত্রী**

অর্থনীতি ও সমাজের অবিচ্ছেদ্য অংশ হিসেবে শ্রমিকদের অধিকারের বিষয়টিতে গুরুত্ব দেওয়া হয়েছে বলে জানিয়েছেন প্রধানমন্ত্রী শেখ হাসিনা। এ ইস্যুতে বাংলাদেশ সরকারের দৃঢ় অঙ্গীকারের কথা তুলে ধরে তিনি বলেন, শ্রম অধিকার রক্ষায় কাজ করে যাচ্ছি। সামগ্রিক আর্থসামাজিক উন্নয়ন নিশ্চিত হলে যথাযোগ্য চাকরির সংস্থান ও শ্রমিক অধিকার প্রতিষ্ঠিত হবে। স্থানীয় সময় গত ১৮ সেপ্টেম্বর সোমবার সন্ধ্যায় নিউইয়র্কের কনভেনশন সেন্টারে প্রধানমন্ত্রী শেখ হাসিনা 'গ্লোবাল ডিল ফর ডিসেন্ট ওয়ার্ক অ্যান্ড ইনক্লুসিভ গ্রোথ' শীর্ষক উচ্চপর্যায়ের ফলোআপ বৈঠকে এসব কথা বলেন। সূত্র-সমকাল (পৃ.১,ক.৭), প্রথম আলো (পৃ.২,ক.২), ডেইলি সান (শেষ পৃ.,ক.১)।

৫। **কয়েকদিনের মধ্যে চালের দাম কমবে : তিনমন্ত্রীর সঙ্গে বৈঠকে ব্যবসায়ীদের আশ্বাস**

আগামী কয়েক দিনের মধ্যে চালের দাম কেজিতে দুই থেকে তিন টাকা কমানোর আশ্বাস দিয়েছেন ব্যবসায়ীরা। একইসঙ্গে চাল আমদানি ও পরিবহণে পাটের বস্তা ব্যবহারের বাধ্যবাধকতা ৩ মাস স্থগিত করে

প্লাস্টিকের ব্যাগ ব্যবহারের অনুমতিসহ স্থলবন্দর দিয়ে চালবাহী ট্রাকগুলো যাতে দ্রুত আসতে পারে, সে ব্যবস্থা করার দাবি জানিয়েছেন। ব্যবসায়ীদের এই দাবিগুলো মেনে চালের ঘাটতি মেটাতে ব্যবসায়ীদের যেভাবে সম্ভব উন্মুক্তভাবে চাল আমদানির নির্দেশনা দেওয়া হয়েছে। চালের বাজার স্থিতিশীল করতে সরকারের তরফ থেকে এ নির্দেশনা দেওয়া হয়। গতকাল (১৯ সেপ্টেম্বর মঙ্গলবার) অনুষ্ঠিত চাল

=৩=

ব্যবসায়ীদের সঙ্গে সরকারের একাধিক মন্ত্রণালয়ের যৌথবৈঠকে এসব সিদ্ধান্ত হয়। সরকারের তরফ থেকে বাণিজ্যমন্ত্রী তোফায়েল আহমেদ, কৃষিমন্ত্রী বেগম মতিয়া চৌধুরী এবং খাদ্যমন্ত্রী অ্যাডভোকেট কামরুল ইসলাম উপস্থিত ছিলেন। সূত্র-সংবাদ (পৃ.১,ক.৭), ইত্তেফাক (পৃ.১,ক.৬), ইন্ডিপেনডেন্ট (পৃ.১,ক.৫), ফিন্যানশিয়াল এক্সপ্রেস (পৃ.১,ক.২)।

৬। আজ থেকে উপজেলাতেও ওএমএসের চাল বিক্রি হবে : খাদ্যমন্ত্রী

এবার দেশের উপজেলাগুলোতেও খোলাবাজারে (ওএমএস) চাল বিক্রি করবে সরকার। স্বল্প আয়ের মানুষের কথা বিবেচনা করে এ সিদ্ধান্ত নেওয়া হয়েছে। গতকাল (১৯ সেপ্টেম্বর মঙ্গলবার) সচিবালয়ে খাদ্যমন্ত্রী অ্যাডভোকেট কামরুল ইসলাম এ তথ্য জানান। তিনি বলেন, আজ (২০ সেপ্টেম্বর বুধবার) থেকে সারা দেশের প্রতিটি উপজেলায় খোলাবাজারে (ওএমএস) চাল বিক্রির কার্যক্রম চালু হবে। তবে সারাদেশে ওএমএস চালু হওয়ায় চলতি সেপ্টেম্বর থেকে আগামী তিন মাস ৫০ লাখ হতদরিদ্র পরিবারের মধ্যে ১০ টাকা কেজি দরে চাল বিক্রির 'খাদ্যবান্ধব কর্মসূচি' স্থগিত থাকবে। সূত্র-ইত্তেফাক (পৃ.৩,ক.৫), সমকাল (পৃ.১৯,ক.৫), নিউ এজ বিজনেস পাতা (পৃ.১,ক.২)।

৭। এবারের পূজায় নিরাপত্তা বেশি জোরদার : স্বরাষ্ট্রমন্ত্রী

সনাতন ধর্মাবলম্বীদের সবচেয়ে বড় ধর্মীয় উৎসব দুর্গাপূজা উপলক্ষে সব ধরনের নিরাপত্তাব্যবস্থা নেওয়া হয়েছে। অন্যান্যবারের তুলনায় এবারের পূজায় নিরাপত্তাব্যবস্থা বেশি জোরদার করা হয়েছে বলে জানিয়েছেন স্বরাষ্ট্রমন্ত্রী আসাদুজ্জামান খাঁন কামাল। গতকাল (১৯ সেপ্টেম্বর মঙ্গলবার) রাজধানীর বনানীতে দুর্গাপূজা উপলক্ষে মহালয়ার উদ্বোধন অনুষ্ঠানে প্রধান অতিথির বক্তব্যে তিনি একথা বলেন। সূত্র-ইনকিলাব (পৃ.১,ক.৫), সমকাল (পৃ.৩,ক.১)।

৮। সংসদীয় গণতন্ত্রের বিকাশে সিপিএ সম্মেলন গুরুত্বপূর্ণ ভূমিকা রাখবে : স্পিকার

জাতীয় সংসদের স্পিকার ড. শিরীন শারমিন চৌধুরী বলেছেন, ঢাকায় অনুষ্ঠেয় ৬৩তম কমনওয়েলথ পার্লামেন্টারি অ্যাসোসিয়েশন (সিপিএ) সম্মেলন কমনওয়েলথভুক্ত দেশসমূহে সংসদীয় গণতন্ত্রের বিকাশ, আইনের শাসন তথা সুশাসন প্রতিষ্ঠায় গুরুত্বপূর্ণ ভূমিকা রাখবে। আগামী ১ থেকে ৮ নভেম্বর ঢাকায় অনুষ্ঠেয় সিপিএ'র সম্মেলন উপলক্ষে গতকাল (১৯ সেপ্টেম্বর মঙ্গলবার) সম্মেলনের প্রস্তুতি সম্পর্কে সংসদভবন মিডিয়া সেন্টারে অনুষ্ঠিত এক সংবাদ সম্মেলনে স্পিকার এসব কথা বলেন। সূত্র-সংবাদ (শেষ পৃ.,ক.৪), ইত্তেফাক (পৃ.৩,ক.৬), এশিয়ান এজ (পৃ.১,ক.৫), ডেইলি স্টার (শেষ পৃ.,ক.৮)।

৯। এলএনজি আমদানিতে সিঙ্গাপুরের গানভার ও পেট্রোবাংলার মধ্যে সমঝোতা স্মারক স্বাক্ষর

এলএনজি ক্রয় ও আমদানিতে পেট্রোবাংলাকে সহযোগিতা করবে সিঙ্গাপুরের গানভার। গতকাল (১৯ সেপ্টেম্বর মঙ্গলবার) গানভার ও পেট্রোবাংলার মধ্যে এ সংক্রান্ত একটি সমঝোতা স্মারক (এমওউ) সই হয় ঢাকার কারওয়ানবাজারের পেট্রোসেন্টারে। এ নিয়ে পাঁচটি বিদেশি কোম্পানির সঙ্গে সমঝোতা চুক্তি সই করলো পেট্রোবাংলা। চুক্তি স্বাক্ষর অনুষ্ঠানে প্রধান অতিথির বক্তৃতায় জ্বালানি প্রতিমন্ত্রী নসরুল হামিদ বলেন, গ্যাসের সংকট আগামী বছরের এপ্রিল থেকে কমতে থাকবে। এমওউতে পেট্রোবাংলার পক্ষে সংস্থার সচিব সৈয়দ আশফাকুজ্জামান এবং গানভারের পক্ষে হেড অভ এলএনজি লাক স্পিরেভেলেড স্বাক্ষর করেন। সূত্র-সমকাল (পৃ.১৯,ক.৬), ইত্তেফাক (পৃ.৩,ক.২), বাংলাদেশ টুডে (পৃ.১,ক.১) ফিন্যানশিয়াল এক্সপ্রেস (পৃ.১,ক.২)।

১০। ২৬ প্রবাসী বাংলাদেশি পেলেন বাংলাদেশ ব্যাংকের রেমিটেন্স অ্যাওয়ার্ড

বাংলাদেশের অর্থনৈতিক অগ্রগতিতে প্রবাসীদের অসামান্য অবদানের স্বীকৃতি প্রদান এবং ব্যাংকিং চ্যানেলে অধিক পরিমাণ বৈদেশিক মুদ্রা পাঠাতে উৎসাহিত করার লক্ষ্যে ২৬ প্রবাসী বাংলাদেশিকে রেমিটেন্স অ্যাওয়ার্ড দিয়েছে বাংলাদেশ ব্যাংক। এছাড়া চারটি অনাবাসী বাংলাদেশি মালিকানাধীন এক্সচেঞ্জ হাউস ও পাঁচটি সর্বোচ্চ রেমিটেন্স আহরণকারী তফসিলী ব্যাংককেও এ সম্মাননা দেওয়া হয়। গতকাল (১৯ সেপ্টেম্বর মঙ্গলবার)

রাজধানীর বাংলা একাডেমিতে ‘বাংলাদেশ ব্যাংক রেমিটেন্স অ্যাওয়ার্ড-২০১৬’ দেওয়া হয়। অনুষ্ঠানটির আয়োজন করে বাংলাদেশ ব্যাংকের ফাইন্যান্সিয়াল ইনক্লুশন ডিপার্টমেন্ট। সূত্র-জনকণ্ঠ (পৃ.১৮,ক.৬), ইত্তেফাক (পৃ.৩,ক.১), ফিন্যানশিয়াল এক্সপ্রেস (শেষ পৃ.,ক.৪)।

১১। পৌরসভার উন্নয়নে আরও ১৬০০ কোটি টাকা দেবে এডিবি

পৌরসভার অবকাঠামো উন্নয়নে ২০ কোটি ডলারের সমপরিমাণ এক হাজার ৬০০ কোটি টাকা ঋণ দেবে এশীয় উন্নয়ন ব্যাংক (এডিবি)। মূলত, স্থানীয় সরকার ব্যবস্থা শক্তিশালী করতে বর্তমান সরকারের নেওয়া কর্মসূচি বাস্তবায়নের অংশ হিসেবে অতিরিক্ত এ অর্থ দেওয়ার প্রতিশ্রুতি দিয়েছে সংস্থাটি। স্থানীয় সরকার বিভাগের চলমান তৃতীয় আরবান গভর্ন্যান্স অবকাঠামো উন্নয়ন শীর্ষক প্রকল্পের আওতায় এ অর্থায়ন

=৪=

করছে এডিবি। এতে মোট ৩২ কোটি ৫০ লাখ ডলার অর্থায়নের প্রতিশ্রুতি দিয়েছে সংস্থাটি। এর মধ্যে গতকাল (১৯ সেপ্টেম্বর মঙ্গলবার) ২০ কোটি ডলারের ঋণচুক্তি স্বাক্ষর হয়। শেরেবাংলা নগরের এনইসি সম্মেলনক্ষেত্রে চুক্তিতে স্বাক্ষর করেন অর্থনৈতিক সম্পর্ক বিভাগের (ইআরডি) সচিব কাজী শফিকুল আযম ও এডিবি’র কাঙ্কি ডিরেক্টর কাজোহিকো হিগুচি। সূত্র-সমকাল (পৃ.১২,ক.২), জনকণ্ঠ (পৃ.১৮,ক.৫), ডেইলি সান বিজনেস পাতা (পৃ.১,ক.৫), ইন্ডিপেনডেন্ট (পৃ.৩,ক.৫)।

সম্পাদকীয়

- ক. **ইত্তেফাক** : যথাযথ সংরক্ষণের অভাবে রাজধানীর ধোলাইরপাড়-কুতুবখালী খালটি বিলীন হয়ে যাচ্ছে উল্লেখ করে দেশের সর্বত্রই অবৈধভাবে খাল দখলের এ ধরনের কর্মকাণ্ড বন্ধে কঠোর ব্যবস্থা নেওয়ার সুপারিশ।
- খ. **সংবাদ** : চট্টগ্রাম সমুদ্রবন্দরে জাহাজজট লেগেই আছে উল্লেখ করে এ ব্যাপারে কার্যকর পদক্ষেপ নেওয়ার ওপর গুরুত্বারোপ।
- গ. **প্রথম আলো** : বৈশ্বিক পুষ্টি পরিস্থিতি নিয়ে একটি প্রতিবেদনে বাংলাদেশে এখন প্রায় আড়াই কোটি মানুষ অপুষ্টিতে ভুগছে এ তথ্য প্রকাশিত হওয়ায় উদ্বেগ প্রকাশ করে দেশের পুষ্টি পরিস্থিতির উন্নয়নে যথাযথ পদক্ষেপ কামনা।
- ঘ. **সমকাল** : পুলিশ বিভাগের গবেষণা প্রতিবেদনে রাজধানীতে যানজটের কারণ বিআরটিএ, সিটি করপোরেশন, রাজউক ও ট্রাফিক পুলিশের সমন্বয়হীনতার কারণ উল্লেখ করে যানজট ‘নিরসনে’ সমন্বিত পরিকল্পনা ও এর যথাযথ বাস্তবায়নের ওপর গুরুত্বারোপ।
- ঙ. **জনকণ্ঠ** : মানবস্বাস্থ্যের জন্য ক্ষতিকর ইলেক্ট্রনিক্স বর্জ্য রিসাইক্লিংয়ের জন্য যথাযথ ব্যবস্থা নেওয়ার সুপারিশ।
- চ. **ইন্ডিপেনডেন্ট** : যত্রতত্র গাড়ি পার্কিং করা রাজধানীর যানজটের অন্যতম কারণ উল্লেখ করে এ ব্যাপারে কার্যকর পদক্ষেপ নেওয়ার ওপর গুরুত্বারোপ।
- ছ. **এশিয়ান এজ** : সম্ভাবনাময় পর্যটনশিল্পের বিকাশে নজর দেওয়ার সুপারিশ করে সম্পাদকীয় প্রকাশ।

উপসম্পাদকীয়

যায়যায়দিন পত্রিকায় প্রকাশিত কলামে উল্লেখ করা হয়েছে, চালের মূল্য বৃদ্ধি নিয়ন্ত্রণের পাশাপাশি যেকোনো অজুহাতে দ্রব্যমূল্য বাড়ানোর অসৎ প্রবণতা বন্ধে কঠোর পদক্ষেপ নিতে হবে।

নিবন্ধ ও ফিচার

যুগান্তর পত্রিকায় প্রকাশিত ‘জীবনসম্পৃক্ত শিক্ষার বিকল্প নেই’ শিরোনামের নিবন্ধে অভিমত প্রকাশ করা হয়েছে, মানুষের ভেতরের অন্তর্নিহিত শিক্ষার আলো জ্বালিয়ে দেওয়ার মধ্যেই শিক্ষার সাফল্য।

#